

Naalakkersuisut Inatsisartut suloriusaanni § 33-mi allassimasut malillugit aalajangiussassatut siunnersuut matumuuna saqqummiuppaat.

Namminersorlutik Oqartussat siunnersuummut tulluuttumut peqataalernissaannut akuersissuteqarnissamut Inatsisartut aalajangiussassaat: Aningaasaatit pigisallu aningaasanik nalillit pillugit isumaqatigiissutit inuinnaallu akornanni pisassaqaataalersunik neriorsoqatiginninnerit allat pillugit inatsisit allanngornerannut peqqussummut Kalaallit Nunaata peqataalernissaa

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Aalajangiussassatut siunnersuutip imarisaa

Peqqussutip siunertaa tassaavoq Aningaasaatit pigisallu aningaasanik nalillit pillugit isumaqatigiissutit inuinnaallu akornanni pisassaqaataalersunik neriorsoqatiginninnerit allat pillugit inatsit nr. 104, 31. marts 1965-imi, kingullermik peqqussut nr. 350, 14. juuli 1980-imi allanngorsimasumi nutarterinissaq.

Inatsisissatut siunnersuutip siunertaa tassaavoq qulakkiissallugu Kalaallit Nunaanni inatsisit atuuttut – Kalaallit Nunaannut naleqqussarneqarsimanissaat – aammalu Danmarkimi inatsisinut atuuttunut toqqaannaq naleqqussaanissaq.

Pingaarnertut siunertaasoq tassaavoq malittarisassat ullutsinnut naleqqussarneqarnissaasa qulakkeerneqarnissaat soorlu ukununnga tunngasut atuisunut isumaqatigiissutini isumaqatigiissusiornermi atugassarititaasut naapertuutinngitsut, inuit namminersorsinnaajunnaarsimasut inatsisitigut inissisimaffii kiisalu inuussutissarsiutillit nakkutigineqarnissaannut malittarisassat.

Siunnersuutigineqarpoq pisinnaatitsissummik tunniussisup toqukkut qimagunnerata kingorna pissarsiassallit eqqartuussivipput aggersarneqartillutik pisinnaatitsissut atorunnaarsinneqartassasoq, pissarsiassallit Statstidende, Atuagagdliutit (AG/Grønlandsposten) tusagassiuutilluunniit naqitsisartut allat aqutigalugit qaaqquneqarsimappata.

Namminersorsinnaajunnaartinneqarsimasut pillugit siunnersuummi siunnersuutigineqarpoq pisinnaatitsissummik tunniussisoq namminersorsinnaajunnaarsinneqartillugu, namminersorsinnaasumik isumaqatigiissusiorfigineqarsimasup inatsisitigut inissisimaffia

allaanerunavianngitsoq namminersorsinnaajunnaarsinneqartumut nammineq
isumaqatigiissusiorsimanermut sanilliullugu.

Namminersorsinnaajunnaarsimasup annaasaqarnissaata illersornissaa anguniarlugu
namminersorsinnaajunnaarsinneqarsimasup sullissisua, akisussaasuusup suliarisinnaanngisai
pillugit, inatsisitigut iliuuseqarsinnaanissamut pisinnaatitaaffeqalerpoq.

Isumaqatigiissutit pillugit inatsimmi kapitalimik nutaamik allaqqasoqalernissaa siunnersuutaavoq,
taannalu atuisunut isumaqatigiissusiornermut malittarisassanut immikkuullarissunut
attuumassuteqarpoq. Malittarisassat immikkuullarissut taakkua naapertuilluarnissamut
nalilersuinissamut, naapertuilluanngitsumik pisoqarsimatillugu inatsisitigut aalajangiinissamut
aammalu inatsisit isumasiornissaannut imaqarpoq.

Siunnersuutigineqarportaaq atuisut inatsisitigut toqqakkanut isumaqatigiissutitut
aalajangersimasunut illersorneqarnissaannut inatsisiliortoqarnissaa. Danmarkimi allannguutit EU-
mi atuisumut isumaqatigiissusiornermi naapertuutinngitsunik malittarisassiortarnermut
aalajangersaanermut naleqqussaanerupput.

Atuisut ombudsmandiannut inatsisit eqqarsaatigalugit peqqussummi Kalaallit Nunaanni
naleqqussaasoqalerpat tuniniaanissamik nittarsaassisarneq aamma nalunaaqutsersuisarneq pillugit
Inatsisartut Inatsisaannut atuuttumut naleqqussaasoqassaaq, taamaalilluni atuisunut ombudsmandi
allaqqanani Atuisartoqarnermut Unammilleqatigiinnermullu Aqutsisoqarfik allaqqassalluni.

Kiisalu siunnersuutigineqarpoq justitsministeriaqarfik Atuisartoqarnermut
Unammilleqatigiinnermullu Aqutsisoqarfiup inassuteqaasiorneratigut, inuussutissarsiornermik
ingerlatsisut nalinginnaasumik atugassarititaasunik naapertuutinngitsunik atuisuusut,
akiligassitsinneqartalernissaannik malittarisassiussasut. Allannguut pineqartoq Danmarkimi
atuutilersinneqarsimavoq EU-mi malittarisassat New Deal Consumersimiittut (nutarterinissamut
malittarisassat) malillugit.

Peqqussutip imarisaasa itinerusumik paasisaqarfiginissaannut naalisagaq ilanngunneqarsimasoq
misissoqquneqarpoq.

Inatsisit atuuttut

Isumaqatigiissuteqarnissamut inatsit pingaarnaq (Aningaasaatit pigisallu aningaasanik nalillit
pillugit isumaqatigiissutit inuinnaallu akornanni pisassaqaataalersunik neriorsogatiginninnerit)
inatsit nr. 242/1917 pigisallu pillugit inatsisit allat atuuttut Kalaallit Nunaannut
atuutilersinneqarsimapput inatsit nr. 104/1965, kingullermik allanngorneqartoq peqqussut nr. 350,
14. juuli 1980 aqqutigalugu. Inatsit kingullermi 1980-imi allanngortinneqartoq Danmarkimi
Isumaqatigiissutitut inatsit 1994, 1995, 1996, 2011, 2015 aamma 2021 allanngortinneqarsimavoq,

siunnersuullu malillugu Kalaallit Nunaannut naleqqussuseq aallaavigalugu nutarterisoqarnissaa siunnersuutaavoq.

Pisortaqarfiit aningaasaqarnerannut allaffissornerannullu sunniutit

Peqqussutissatut siunnersuut pisortaqarfiit aningaasaqarnerannut allaffissornerannullu sunniuteqassanngilaq. Maluginiaqquneqarporli pigisanut pisinnaatitaaffik, isumaqatigiissusiornissamut inatsimmi ilaasoq, sulì qallunaat sulìassaqaqarfigissammassuk.

Namminersorlutik inuussutissarsiutigalugu ingerlatsisunut aningaasaqarnerannut allaffissornerannullu sunniutit

Inatsisissatut siunnersuummi allannguutit aallaavigalugit inuussutissarsiortut atugassarititaasunik nalinginnaanerakkaminnik, naapertuutinngitsunilli, atuisunut atuitillutik akiligassamik pineqaatissinneqarsinnaalissapput.

Innuttaasut aningaasaqarnerannut allaffissornerannullu sunniutit

Peqqussutissatut siunnersuut innuttaasut aningaasaqarnerannut allaffissornerannulluunniit tunngatillugu sunniuteqarnavianngilaq.

Atuisulli ullumikkornit illersorneqarnerunissaannut siunnersuut aalajangersagaqarpoq.

Naligiissitaaneq

Siunnersuut aallaavigalugu naligiissitaanermut kingunerluuteqarnavianngilaq.

Tusarniaaneq

Siunnersuut 22. juuli 2025-mit 2. septembari 2025-p tungaanut tamanut tusarniaassutaanikuuvoq, siunnersuuttaaq tusarniaaffissanut naleqquttunut arlalinnut toqqaannaq nassiunneqarnikuuvoq.

Tusarniaanermi akissuteqaatit arfinillit tigusimavagut, tamarmilli allaqqitassiamut oqaaseqaatissaqarsimangillat.

Ilanngussaq:

- 1) Siunnersuut uunga: Aningaasaatit pigisallu aningaasanik nalillit pillugit isumaqatigiissutit inuinnaallu akornanni pisassaqaataalersunik neriorsogatiginninnerit allat pillugit inatsisit allanngornerannut peqqussummut Kalaallit Nunaata peqataalernissaanut peqqussut.
- 2) Aningaasaatit pigisallu aningaasanik nalillit pillugit isumaqatigiissutit inuinnaallu akornanni pisassaqaataalersunik neriorsogatiginninnerit allat pillugit inatsisit allanngornerannut peqqussummut Kalaallit Nunaata peqataalernissaanut peqqussutip naalisarnera.